

Starfsskýrsla Íþróttafélagsins Stefnis 2025



Stjórn Stefnis árið 2025

Á aðalfundi félagsins 20. febrúar 2025 var kosin ný stjórn og er hún þannig skipuð:

Svava Rán Valgeirsdóttir formaður: netfang: svavava@simnet.is s: 895-1780

Svala Sigríður Jónsdóttir ritari: netfang: svalasta@gmail.com s: 866-2608

Þorgerður Karlsdóttir gjaldkeri, netfang: dolla@snerpa.is s: 899-9562

Dominik Bochra meðstjórnandi, netfang: dominikb@simnet.is s: 893-9792

Katarzyna Malizewska meðstjórnandi, netfang: kasia4702@wp.pl s: 895-1041

Íþróttastarfið 2025

Íþróttastarf Stefnis var með nokkuð hefðbundnum hætti á síðasta starfsári. Boðið var upp á blakæfingar yfir vetrartímamann fyrir yngri börnin en við þurftum að hætta með æfingar fyrir eldri hópinn þar sem hann var orðinn það fámennur en sá hópur mætir á æfingar á Ísafjörð.

Mikil ánægja er með að það tókst loksins að bjóða upp á íþróttaskóla fyrir 1.–4. bekk á vorönn en hins vegar voru æfingar mjög slitróttar á haustönn og mjög oft sem tíminn féll niður.

Við erum alltaf mjög ánægð með að geta boðið upp á sund- og leikjanámskeið á sumrin en þau eru alltaf vinsæl og vel sótt. Við höfum verið heppin að fá Kolbrúnu Fjólu Arnarsdóttur íþróttakennara til að vera bæði með leikja- og sundnámskeiðið.

Boðið er upp á fjölskyldutíma í íþróttahúsinu á laugardögum og sunnudögum og eru foreldrar duglegir að nýta sér það með sínum börnum.

Ákveðið var að bjóða upp á æfingar í tækjasalnum fyrir unglinga þar sem við fundum fyrir áhuga á því. Unglingar upp að 18 ára aldri hafa ekki leyfi til að nýta tækjasalinn nema með foreldrum og heftir það mjög aðgengi þeirra að salnum.

Ýmsar skemmtilegar upptækur voru á árinu, má þar nefna öskudagsball, sumardagsins fyrsta hátíð, Víðavangshlaup og í ár tókum við þátt í Sjómannadeginum á Suðureyri með Sjómannadagsráði.

Við erum alltaf opin fyrir nýjum hugmyndum til að efla hreyfingu og íþróttaiðkun í samfélaginu, því er um að gera að hafa samband við félagið ef einhver er með góða hugmynd.

Félagið fékk styrk frá Fræðslu- og verkefnasjóði UMFÍ til að skanna inn gamlar fundargerðar-
bækur. Guðfinna M. Hreiðarsdóttir hélt utan um þetta verkefni og sá hún um að skanna elstu
fundargerðarbækur félagsins og eru þær núna aðgengilegar á vef Skjalasafns Ísafjarðarbæjar.
Það er mikill fróðleikur í þessum bókum og sögu íþróttaiðkunar í Súgandafirði er þar að finna.
Það er mjög ánægjulegt að geta stuðlað að betra aðgengi að þessum fundargerðabókum og
þökkum við Guðfinnu kærlega fyrir aðkomu hennar að þessu verkefni.

Á árinu fengu tveir stjórnarmenn í Stefninu viðurkenningu fyrir sín störf í þágu barna og
íþróttahreyfingarinnar. Svava Rán Valgeirsdóttir formaður fékk silfurmerki UMFÍ en hún hefur
verið formaður Stefnis frá 2005 og setið í stjórn blakdeildar Vestra. Þorgerður Karlsdóttir var
valin sjálfboðaliði ársins á Vestfjörðum en viðurkenningin er veitt af UMFÍ. Hún hefur verið í
stjórn Stefnis frá 2006 og hefur setið í stjórn blakdeildar Vestra og verið virk í starfi þeirra.

Við fengum heimsókn frá KSÍ í júní en það var hann Siguróli Kristjánsson sem kom og var
með fótboltaæfingu. Um er að ræða átaksverkefni KSÍ til að auka áhuga krakka á fótbolta.
Farið var í skemmtilega leiki og settur upp pannavöllur á sparkvellingnum við grunnskólann.

Í samstarfi við blakdeild Vestra tóku Stefniskrakkar þátt í mótum á síðasta ári. Má þar nefna
mót yngri flokka sem haldið var á Ísafirði og einnig Íslandsmót sem haldið var í Laugardalshöll.

Aðalfjáröflun félagsins er í formi dós- og flöskusöfnunar. Á hverju ári eru farnar nokkrar
ferðir um þorpið til þess að safna dósunum. Þess á milli getur fólk sjálft farið með flöskur og
dósir í skúrinn okkar við íþróttavöllinn. Við viljum þakka þeim sem styðja félagið á þann hátt
að gefa okkur flöskur og dósir.

Stefnir sér um hreinsun á rusli sem til fellur vegna flugelda um áramótin. Einnig sér
íþróttafélagið um hreinsun á rusli á Suðureyri á hverju vori. Alltaf er mjög góð þátttaka í
vorhreinsun og boðið er upp á grill eftir hreinsun. Greitt er fyrir þessa vinnu í gegnum
þjónustusamning Ísafjarðarbæjar við HSV.

Ársþing HSV var haldið á Suðureyri 22. maí og sá félagið um kaffiveitingar og fékk greitt fyrir
það. Þingið heppnaðist vel og fundarmenn ánægðir með þær veitingar sem Stefnir bauð upp á.

Hægt er að sækja um styrki í dósasjóð Stefnis til að standa straum af keppnisferðum. Skiptir þá
ekki máli hvort að viðkomandi sé að keppa með félaginu eða öðru félagi. Hins vegar þarf

viðkomandi barn og/eða foreldrar að hafa tekið þátt í dósasöfnun með félaginu. Nokkuð var um styrkveitingar á árinu.

Í boði er að sækja um akstursstyrk til Ísafjarðarbæjar fyrir foreldra barna sem stunda íþróttir og/eða tómstundir í öðrum byggðakjörnum. Það er gert til að mæta kostnaði við að keyra börn á milli. Íþróttafélagið vill hins hvetja Ísafjarðarbæ til að bjóða upp á Frístundarútu til að mæta þessari þörf og koma í veg fyrir mismunun hjá börnum, þar sem ekki hafa allir foreldrar tök á því að keyra börn sín á milli.

Iðkendur og félagsmenn á starfsárinu.

Iðkendur undir 16 ára: 36

Félagsmenn: 33

Lög félagsins:

I Heiti

Félagið heitir STEFNIR og hefur aðsetur sitt á Suðureyri.

II Markmið

- a) Markmið félagsins er að halda uppi almennri íþróttastarfsemi, auk annars tómstundastarfs sem lýtur að þroska félagsmanna og heill lands og þjóðar.
- b) Markmið félagsins er að auka áhuga félagsmanna og almennings á líkamsrækt og stuðla að aðhliða íþróttaiðkun.

III Félagsmenn

- a) Félagi getur hver sá orðið sem æskir þess og er samþykktur af meirihluta stjórnarinnar.
- b) Stjórn félagsins er heimilt að víkja mönnum úr félaginu á líti hún framkomu þeirra eða gjörðir vítaverðar. Ákvörðun stjórnar má skjóta til aðalfundar, sem hefur þá úrslitavald.
- c) Fullt árgjald greiða allir félagar sextán ára til sextíu ára. Sex til fimmtán ára greiða hálf gjald. Yngri en sex ára greiða ekkert gjald og eldri en sextugir eru ævifélagar án gjaldtöku.

IV Stjórn félagsins

- a) Stjórn félagsins skipa formaður, ritari , gjaldkeri og tveir meðstjórnendur.

V Aðalfundur

- a) Aðalfundur skal haldinn í mars ár hvert og skal formaður boða til hans með tveggja vikna fyrirvara. Skal fundurinn auglýstur á áberandi stað á Suðureyri .
- b) Á aðalfundi skal formaður gefa skýrslu um starf liðins árs og gjaldkeri leggja fram endurskoðaða reikninga.

- c) Aðalfundur ákveður á hverjum tíma árgjald félaga, og skal stjórn félagsins halda félagatal yfir alla félaga, hvort sem þeir eru virkir félagar eða styrktarfélagar og skal ritari geyma félagatalið.
- d) Á aðalfundi félagsins ræður einfaldur meirihluti úrslitum mála.
- e) Á aðalfundi sem og öðrum fundum skulu almenn fundarsköp gilda.

VI Kosningar

- a) Á aðalfundi skal kjósa stjórn félagsins (5) og tvo endurskoðendur.
- b) Stjórnin skal kosin leynilegri kosningu samkvæmt tilnefningu (uppástungu). Fyrst skal kjósa formann, síðan aðra stjórnarmenn. Stjórnin skal kosin til tveggja ára, formaður og ritari annað árið en hitt árið gjaldkeri og tveir meðstjórnendur. Endurskoðendur skulu kosnir til eins árs.
- c) Séu jafnmargir frambjóðendur og embætti eru, er sjálfkjörið í þau.
- d) Kjörgengi og atkvæðisrétt hafa allir félagar Stefnis sem náð hafa 16 ára aldri og eru skuldlausir við félagið.
- e) Falli atkvæði jöfn skal varpa hlutkesti á milli hlutaðeiganda.

VII Keppnisreglur

Keppnisreglur, flokkaskipting og annað sem varðar tækniatriði og framkvæmd í keppnum er í samræmi við lög Í.S.Í og HSV.

VIII Breytingar

- a) Engu má breyta í lögum þessum nema á aðalfundi með samþykki 2/3 greiddra atkvæða.
- b) Skulu lagabreytingar auglýstar (sendar út) með aðalfundarboði.

IX Gildistaka

Lög þessi öðlast þegar gildi. Samþykkt á aðalfundi 12.4.2022

Svava Rán Valgeirsdóttir formaður Stefnis

Suðureyri 11.03.2026